

MUSICA

LA VILLA BABILONIA EXISTA!

da H.

Quai che la Villa Babilonia è per la Pippi Soccalunga è il Centre Fries per la glied giuvna a Friburg. Nua che la Pippi Soccalunga fa sias lumparias infantilas, fan ils juvenils parti. Atmosfera da partis da garascha cumbinada cun musica nunenconuscenta.

Ushè pon ins delectar il Fries. E precis quai è il spezial e bel da nossa villa. (Forsa era la biera favuraivla, però quai èn be speculaziuns.) Ins na sa mai, sche quai ch'ins vegn ad udir è buna musica, musica che plascha.

E tuttina datti els: ils acts ch'èn vegnids conuschents en Svizra. In da quels, forsia il pli renumà, è My Name Is George. Els èn vegnids premiads il 2006 sco meglra band da la Svizra da DRS3 ed han lantschà lur carriera tranter auter en il Fries.

La musica che vegn purschida als auditurs è uschè diversa e differenta sco quai ch'ils students èn divers e different. Da hip hop, reggae-ragga, soul, funk, punk, indie, chansons franzosas etc. porscha il Fries tut quai ch'il cor da musica giavischa. Perfin tuns africans han ins pudì udir avant curt. Il potenzial da pudair far festa è tras quai garantì. Quella garanzia vegn anc suttastritgada cun l'infrastructura da la villa. In tschaler cun ina sala pli pitschna, nua ch'ins po giugar fustballin, ed ina sala pli gronda, Safari-like, nua ch'ins po sautar tar la musica che vegn sunada d'in palc ch'è mo trais sin dus meters, halt Safari-like. Quels che na pon betg pli sautar u che na pon pervia d'auters motifs betg pli star sin pe, dastgan ir a seser sin ils different sofas en la gronda sala a l'entrada dal Fries e spetgar fin ch'il Fries serra, baiver ulteriuras bieras u conversar cun la glied che sesa gist dasperas. (Però betg spetgar conversaziuns profundas, da quellas uras vegn'ins gist anc da far smalltalk iper-superficial).

L'unic ch'è donn è ch'il Fries serra sias portas il pli tard a las 00:00. Lura datti anc trais pussaivladads: ir vinavant en il FriSon, ir a chasa sulet u ir a chasa cun quella o quel che t'ha fatg impressiun durant il smalltalk.

Centre Fries – la Villa Babilonia per la giuventetgna a Friburg



Il Fries na porscha dentant betg mo musica, mabain era sairas da film mintgamai il glindesdi, sairas cun spaisas internaziunalas mintga mardi (cuschiniers èn mintgamai students d'Erasmus u students ch'èn gia viaggiads en quels pajais), la mesemna e la gievgia èn las sairas cun concerts gratuits.

H. aka **Adrian Stecher** (23) è student da las ciencias da medias e comunicaziun a Friburg. Il plaschair per la musica al ha gia tschiffà d'uffant. Il bab è organist e la mamma sunava excellentamain la flauta, uschia ch'el ha sunà sur bliers onns il triangul. Per el è musica insatge che unescha, perquai na pudess el betg imaginar ina vita senza musica. Per las PUNTS va el a la tschertga da novas bands naziunalas ed internaziunalas e rapporta da concerts, albums ed experientschas fatgas cun la musica. Per il Radio Rumantsch moderescha Adrian tranter auter mintga segunda sonda la parada da hits.